



PATNUBAY SA MISA



24 Mayo 2015

Dakilang Kapistahan ng Pentekostes

Taon B

Banal na Espiritu, Gawin Mo Kaming Dalisay!

*N*abubuhay tayo sa mundo ng mga hidwaan, inggit at panibugho, at iba't ibang anyo ng pagkaalipin. Lahat ng ito ay bunga ng KASALANAN, mula sa kauna-unahan hanggang sa pinakahuling kasalanan ipinagdilig ng abot-tanaw ng sangkatauhan. Sa ganang sarili, di natin makakayanan ang mga gayong mapanirang lakas. Kaya nga, ipinangako ng Diyos ang Banal na Espiritu bilang dakilang mapagpagaling na Kapangyarihang susugpo sa mga traheya ng pagkakawatak-watak, pag-aalintangan, pagkamuhi, at kamatayang bunga ng pagkakasala ng tao.

Sa paggunita natin sa pagbaba ng Banal na Espiritu sa mga disipulong natitipon noon sa Silid sa Itaas, buksan natin ang ating mga puso sa Kanya upang tayo man ay maging kabahagi nila sa gayong karanasan. Itulad nawa tayo ng Banal na Espiritu kay Hesus at sa pamayanang may pagmamahalan, pagpapahalaga, at pagkakaisa.



PASIMULA



Pambungad

(Ipahayag lamang kung walang awiting nakahanda.)

Espiritu ng Poong D'yos, lumukob sa sansinukob, at sa tanang kanyang sakop, dunong niya ay pumuspos. Aleluya ay ihandog!

Pagbati

P –Ang pag-ibig, biyaya, at kapayapaan ng Espiritu Santo ay sumainyong lahat!

B –At sumaiyo rin!

Pagsisisi

P –Mga kapatid, alalahanin natin kung gaano ang pangangailangan natin sa Banal na Espiritu sa ating buhay at kung paano tayo di naging karapat-dapat sa Kanyang pananatili sa atin. *(Manahimik saglit.)*

P –Panginoong Hesus, ipinag-

kaloob mo ang Banal na Espiritu sa iyong mga alagad upang maging Guro at Taga-pagtanggol nila. Panginoon, kaawaan mo kami!

B –Panginoon, kaawaan mo kami!

P –Panginoong Hesus, ipinagkaloob mo ang Banal na Espiritu sa iyong Simbahan upang maakay ito sa buong katotohanan. Kristo, kaawaan mo kami!

B –Kristo, kaawaan mo kami!

P –Panginoong Hesus, ipinagkaloob mo ang Banal na Espiritu sa iyong Simbahan upang maging bukal ito ng pagpapatawad at pagpapakabanal. Panginoon, kaawaan mo kami!

B –Panginoon, kaawaan mo kami!

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen!

Papuri

B –Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasalamatan ka namin dahil sa dakila mong anging kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P—Ama naming makapangyarihan, pinababalan mo ang iyong pandaigdig na Sambayanan sa ipinahahayag mo ngayon sa dakilang kapistahan. Gawin mong ang buong daigdig ay mapuspos nang ganap sa mga kaloob ng Espiritu Santong bigay mo sa lahat para puspusin ang kalooban ng tanan noong ang Mabuting Balita ay simulang ipangaral sa pamamagitan ni Hesukristo kasama ng Espiritu Santo magpasawalang hanggan.

B—Amen!

PAGPAPAHAYAG NG SALITA NG DIYOS



Unang Pagbasa Gw 2:1-11

Ang pagbaba ng Banal na Espiritu noong Araw ng Pentekostes ay tumupad sa ipinangako ni Hesus sa Huling Hapunan at bago siya umakyat sa langit. At nagsimula na noon ang sangkatauhan maging bagong bayan ng Diyos, na tinatampukan ng pagkakaunawaan, pagkakaisa, at pagmamahalan.

L—Pagpapahayag mula sa mga Gawa ng mga Apostol

Nang sumapit ang araw ng Pentekostes, nagkatipon silang lahat sa isang lugar. At biglang narinig ang isang ugong mula sa langit, animo'y hagunot ng malakas na hangin, at napuno nito ang bahay na kinaroroonan nila. May nakita silang wari'y mga dilang apoy na lumapag sa bawat isa sa kanila. At silang lahat ay napuspos ng Espiritu Santo at nagsalita ng iba't ibang wika, ayon sa ipinagkaloob sa kanila ng Espiritu.

May mga Judiong buhat sa iba't ibang bansa, na naninirahan noon sa Jerusalem, mga taong palasamba sa Diyos. Nang marinig ang ugong na ito, nagdatingan ang maraming tao. Namangha sila sapagkat sinasalita ng mga alagad ang mga wika nila. Sa kanilang pagtataka ay kanilang nasabi, "Hindi ba Galileo silang lahat? Bakit ang atin-ating katutubong wika ang naririnig natin sa kanila? Tayo'y mga taga-Partia, mga taga-Media, mga taga-Elam; mga naninirahan sa Mesopotamia, sa Judea at sa Capadocia, sa Ponto, at sa Asia. Mayroon pa sa ating taga-Frigia at Panfilia, Egipto at sa mga saklaw ng Libia na sakop ng Cirene, at mga nakikipanirahan mula sa Roma, maging mga Judio at mga naakit sa Judaismo. May mga taga-Creta at Arabia pa rito. Paano

sila nakapagsasalita sa atin-ating wika tungkol sa mga kahanga-hangang gawa ng Diyos?"

Ang Salita ng Diyos!

B—Salamat sa Diyos!

Salmong Tugunan Awit 103

B—*Espiritu mo'y suguin, Poon, tana'y 'yong baguhin!*

R. M. Velez



* Pinupuri ka, Poong Diyos, nitong aking kaluluwa, O Panginoong Diyos, kay dakila mong talaga! Sa daigdig ikaw, Poon, kay rami ng iyong likha, sa dami ng nilikha mo'y nalaganapan ang lupa. **B.**

* Natatakot mangamatay kung kitlin mo ang hininga; mauuwi sa alabok, pagkat doon mula sila. Taglay mo ang Espiritu upang buhay ay ibalik, bagumbuhay ay dulot mo sa nilikha sa daigdig. **B.**

* Sana ang 'yong karangala'y manatili kailanman; sa lahat ng iyong likha, ang madama'y kagalakan. Ang awit ng aking puso sana naman ay kalugdan, habang aking inaawit ang papuri sa Maykapal. **B.**

Ikalawang Pagbasa 1 Cor 12:3-7.12-13

Nahaharap noon ang Corinto sa pagkakahati-hati at iringan. Bilang amang nagmamalaskit, si Pablo ay nangangaral sa kanilang magkaisa sa Banal na Espiritu na siyang bukal ng lahat ng biyaya.

L—Pagpapahayag mula sa Unang Sulat ni Apostol San Pablo sa mga taga-Corinto

Mga kapatid: Hindi masasabi ninuman, "Panginoon si Hesus," kung hindi siya pinapatnubayan ng Espiritu Santo.

Iba't iba ang kaloob, ngunit iisa lamang ang Espiritung nagkaloob ng mga ito. Iba't iba ang paraan ng paglilingkod, ngunit iisa lamang ang Panginoong pinaglilingkuran. Iba't iba ang mga gawain ngunit iisa lamang ang Diyos na sumasalihat ng taong gumagawa ng mga iyon.

Ang bawat isa'y binigyan ng kaloob na naghahayag na sumasakanya ang Espiritu, para sa ikabubuti ng lahat.

Sapagkat si Kristo'y tulad ng isang katawan na may maraming bahagi; bagamat binubuo ng iba't ibang bahagi, iisa pa ring katawan. Tayong lahat, maging Judio o Griego, alipin man o malaya, ay bininyagan sa iisang Espiritu upang maging isang katawan.

Tayong lahat ay pinainom sa isang Espiritu.

Ang Salita ng Diyos!

B—Salamat sa Diyos!

Awit tungkol sa Mabuting Balita

B—Halina, Espiritu, • sa sinag buhat sa 'yo • kami'y liwanagan mo.

Ama ng maralita, • dulot mo'y pagpapala • upang kami'y magkusa.

Kaibiga't Patnubay, • sa amin mananahan • ang tamis ng 'yong buhay.

Ginhawang ninanais, • lilim namin sa init, • kapiling bawat saglit.

Lubhang banal na ilaw, • kami'y iyong silayan • ngayon at araw-araw.

Kapag di ka nanahan • ay walang kaganapan • ang buhay nami't dangal.

Marumi'y palinisin, • lanta'y panariwain, • sakit nami'y gamutin.

Kami'y gawing matapat, • sa pag-ibig mag-alab, • lagi sa tamang landas.

Tugunin aming luhog, • kami'y bigyang malugod • ng 'yong pitong kaloob.

Gantimpala'y ibigay, • sa hantungan ng buhay • ligayang walang hanggan.

Aleluya

B—Aleluya! Aleluya!

Espiritung aming Tanglaw, kami'y iyong liwanagan sa ningas ng pagmamahal. Aleluya! Aleluya!

Mabuting Balita In 20:19-23

Sinasabi ni San Juan na ang Banal na Espiritu ang unang handog na ipinagkaloob ni Hesus sa mga disipulo sa araw mismo ng kanyang muling pagkabuhay.

P—Ang Mabuting Balita ng Panginoon ayon kay San Juan

B—Papuri sa iyo, Panginoon!

Kinagabihan ng Linggo ding iyon, ang mga alagad ay nagkakatipon. Nakapinid ang mga pinto ng bahay na kanilang pinagtitipunan dahil sa takot nila sa mga Judio. Dumating si Hesus at tumayo sa gitna nila. "Sumainyo ang kapayapaan!" sabi niya. Pagkasabi nito, ipinakita niya ang kanyang mga kamay at ang kanyang tagiliran. Tuwang-tuwa ang mga alagad nang makita ang Panginoon.

Sinabi na naman ni Hesus, "Sumainyo ang kapayapaan! Kung paanong sinugo ako ng Ama, gayon din naman, sinusugo ko kayo."

Pagkatapos, sila'y hiningahan niya at sinabi, "Tanggapin ninyo ang Espiritu Santo. Ang patawarin ninyo sa kanilang mga kasalanan ay pinatawad na nga; ang hindi ninyo patawarin ay hindi nga pinatawad."

Ang Mabuting Balita ng Panginoon!

B – Pinupuri ka namin, Panginoong Hesuskristo!

Homiliya

Sumasampalataya

B– Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesuskristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P – Nakababatid sa pangangailangan natin sa tulong ng Banal na Espiritu sa pagharap sa mga hamon ng ating buhay Kristiyano, manalangin tayo:

B – Halina, Banal na Espiritu, kailangan Ka namin!

* Na ang buong Simbahang Katolika ay laging maging kasangkapan ng pakikipagkasundo at tagapagtaguyod ng pagkakaisa ng mga tao. Manalangin tayo! **B.**

* Na ang mga pinuno ng Simbahan ay patuloy na maging inspirasyon ng kanilang mga pinamumunuan. Manalangin tayo! **B.**

* Na lahat ng guro ay makapagkintal ng mga tunay na pagpapahalaga sa kanilang mga tinuturuan. Manalangin tayo! **B.**

* Na lahat ng mga pinunong pambayan sa buong mundo, lalo na sa ating bansa, ay gabayan ng malasakit sa kapakanang panlahat. Manalangin tayo! **B.**

* Na ang mga binabalisa ng mga pagsubok ay makalaspang ng ginhawa at lakas na dulot ng Banal na Espiritu. Manalangin tayo! **B.**

* Tahimik nating ipanalangin ang ating mga pansariling kahilingan. (*Tumigil sandali.*)

Manalangin tayo! **B.**

P–Espiritu ng buhay at kabanalan, gabayan mo ang aming mga puso sa landas ng pagmamahalan at paglilingkod nang kami'y maging tunay na mga kasangkapan sa pagtatatag ng Kaharian kung saan ka nabubuhay at naghaharing kasama ng Ama at ng Panginoong Hesus, iisang Diyos magpakailanman.

B – Amen!

PAGDIRIWANG NG HULING HAPUNAN



P– Manalangin kayo . . .

B– Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P– Ama naming Lumikha, pakundangan sa pangako ng iyong Anak ang lihim ng iyong pag-ibig at paglingap ay isiwalat nawa ng Espiritu Santo ngayong ginaganap ang paghahaing ito na siya rin nawang maglahad ng iyong katapatan sa pamamagitan ni Hesuskristo magpasawalang hanggan.

B – Amen!

Prepasyo ng Pentekostes

P– Ama naming makapangyarihan, tunay ngang marapat na ikaw ay aming pasalamat.

Ngayo'y iyong nilubos ang ginanap na pagtubos ng iyong Anak na si Hesuskristo na siyang nakaluklok sa kanan mo. Espiritu'y lumulukob sa mga taong tinubos na iyong itinatampok bilang kapatid ni Kristo Hesus. Araw ngayon ng pagsilang ng binuong sambayanan ng iyong Anak na mahal. Tanang tinubos na bansa ikaw ang dinadakila. Espiritu'y lumilikha ng nagkakaisang diwa.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B – Santo, santo, santo . . .

Pagbubunyi

B– Sa krus mo't pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.

PAKIKINABANG



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos . . .

Paanyaya sa Pakikinaabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging. **B**– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinaabang
(*Ipahahayag lamang kung walang awiting nakahanda.*)

Noong lumukob sa tanan, sugong Espiritung Banal, mga gawa ng Maykapal sama-samang inawitan ng Aleluyang parangal.

Panalangin Pagkapakinabang

P–Ama naming mapagmahal, pinapakinabang mo ang iyong Sambayanan sa iyong mga bigay buhat sa kalangitan. Ang iyong pagpapalang kaloob sa amin ay iyong panatilihin upang laging masaganang dumaloy ang Espiritu Santo at ang aming pinagsaluhan sa pagdiriwang na ito ay magdulot ng pag-unlad sa pamamagitan ni Hesukristo magpasawalang hanggan.

B–Amen!

PAGWAWAKAS



P–Sumainyo ang Panginoon.

B–At sumaiyo rin!

P–Magsiyuko at ipanalangin ang pagpapala ng Diyos. (*Manahimik saglit.*)

Pagpalain kayo ng Banal na Espiritu ng kasaganaan ng Kanyang handog. Patuloy nawa kayong gabayan sa kabanalan sa inyong buhay.

B–Amen!

P–Nawa tupuking lahat ng apoy na nanaog sa mga disipulo ang lahat ng kasamaan sa inyong mga puso at papanginasin ang mga ito sa dalisay na liwanag.

B–Amen!

P–Tibayan nawa ng Diyos ang inyong pananampalataya sa mga oras ng alinlangan at pagkalooban nawa kayo ng inaasahang buhay na walang hanggan sa piling ng mga banal.

B–Amen!

P–Pagpalain kayo ng makapangyarihang Diyos: Ama, Anak, at Espiritu Santo.

B–Amen!

P–Sa pamamatnubay ng Espiritu Santo, humayo kayo sa kapayapaan ni Kristo.
Aleluya! Aleluya!

B–Salamat sa Diyos!
Aleluya! Aleluya!

ANG ESPIRITUNG NAGBUBUKLOD AT NAGPAPADALISAY SA ATIN

Pinalaya tayo ni Hesus sa kasalanan sa pamamagitan ng kanyang pagpapakasakit, kamatayan, at muling pagkabuhay. Salamat sa kanya, nakalaan at idinudulot sa lahat ang kaligtasan. Gayuman, di ito nangangahulugang tayo ay kawan-kawang isinasama na sa langit. Sinira ni Kristo ang kasalanan, ngunit hindi ang ating kalayaan. Maaari pa ring minsan pa tayong sumagot ng “Hindi!” sa Diyos.

Habang tayo’y nabubuhay sa lupa, ang kasalanan ay nananatili pa ring “posibleng aksidente” bunga ng maraming dahilang pinangunahan ng mga tukso ng demonyo, masasamang impluwensiya ng ating kapaligiran, at lalo na ng kahinaang moral ng ating napinsalang kalikasan. Patuloy na napatutunayang ang kasalanan ay isang malungkot na katotohanan hanggang ngayon, sa ating sari-sarili at sa paligid natin.

Alam ni Hesus na magkakaganito. Kaya naman paulit-ulit siyang nangako hanggang ipinagkaloob niya ang Banal na Espiritu sa Simbahan upang maipagpatuloy niya ang misyong panlunas sa bisa ng kapangyarihan ng Bukal ng pagkakaisa, pagtutulungan, at kabanalan.

Sa gayon, kinumpleto ni Hesus ang kanyang pantubos na gawain sa pagbibigay-kapangyarihan sa Simbahang maipagpatuloy ang laban sa lahat ng naghahati sa sangkatauhan, lahat ng ating ikinapagiging makasarili, palalo, mapusok, at mapang-api.

At ganito ang patuloy na ginagawa ng Simbahan sa buhay nitong may 2,000 taon na, sa kabila ng kahinaan ng kanyang mga taong kawaksi. Ang Banal na Espiritung taglay niya bilang kanyang “kaluluwa,” ay siyang dakila’t banal na Kapangyarihang ikinapagiging laging buhay, tuwinang nagpapasigla at gumagabay sa kanya sa higit na pagpapahalaga sa mga katotohana’t pagpapahayag, nagpapabanal at nagpapalakas sa kanya laban sa lahat ng panganib at pakikibaka.

At sa gayon patuloy ang misteryo ng Pagkakatawang-tao – nagliligtas ang Diyos sa pamamagitan ng mga tao, di lamang sa pamamagitan ni Hesus na kabanal-banal, kundi sa paglilingkod din ng mga taong marurupok at makasalanan, ngunit pinagpapala at pinalalakas ng Espiritu ng pag-ibig, pagkakaisa, at kabanalan.

Di natin lubos na mapasalamatan ang kahalagahan ng papel na ginagampanan ng Banal na Espiritu sa Simbahan at sa atin. Kung wala siya, ang Simbahan ay magiging isa lamang hamak na institusyong pantao, na may hangganan tulad ng iba pang institusyon, imperyo, at sibilisasyon. Ngunit ang Simbahan ay tatagal hanggang sa wakas ng panahon dahil lamang ito’y pinasisigla ng Panginoon ng Buhay.

Salamat sa presensiya ng Espiritu, ang kaligtasan at iba pang kaloob ni Kristong Muling Nabuhay ay pinadadaloy rin sa mga tao lalo na sa mga gawaing pangkabanalang tinatawag nating “mga sakramento.” Tiyakang ang mapagpatawad na pagmamahal ng Diyos ay nagiging isang katunayan sa atin ngayon, sa pamamagitan ng sakramento ng Pagbabalik-loob na nagpapabangon sa atin tuwing tayo’y nadadapa, dinadalisyay at pinasisigla ng mapagpatawad na pagmamahal ng Diyos.



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org, wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, Sr. F. Santos, SMI, G. Ramos, R. Molomog, D. Daguio, V. David • Illustrations: A. Sarmiento, B. Cleofe • Circulation: F. Edjan